

國朝常州駢體文錄

國朝常州駢體文錄卷第二目

思補齋文十五首

武進劉星煒圖三

聖駕祇謁

泰陵西幸五臺恭賦

駕幸京口三山賦

駕幸鄧尉香雪海賦

駕幸棲霞山賦

駕幸熱河賦

謹敘

聖駕巡幸盛京展謁

祖陵恭頌

謹敘

聖駕恭詣 孔林恭頌

謹敘

聖駕三幸江浙迎 鑾恭頌

謹敘

聖武遠揚準夷平定恭擬饒歌八章

并敘

張明府瓊海紀事敘

沈觀察從軍集敘

栖靈寺同戒錄敘

爲勝國閻陳二公徵詩啟

謝方宜田制府惠字冊啟

祭主政盧仲醇文

國朝常州駢體文錄卷第二目

國朝常州駢體文錄卷第二

思補齋文

武進劉星煒圖三

聖駕祇謁

泰陵西幸五臺恭賦

粵若重光之歲

聖母皇太后七旬萬壽介純禧闡靈繹返鴻祐環瀛之內
罔不說穆人雖恐後先是回部以蕩平告狼臚烏詩混一
尉候隸於職方史區不能算章亥不能造焉地符旣升元
象迭奏攝提貞於孟陬日在元正二曜貞明五緯宿留煥
乎若縣黎垂棘駢雙轂而麟編纍兮若明月夜光貫百琲
而聯圻也遐稽瑞牒高陽氏以降鮮或邁之覃精極崇於
我聖朝星紀載周殊祥迭邁百昌之瑞輳萬國之驩聚

皇上爰以仲春之月恭返

慈輦祇謁

泰陵順軌所詣幸於五臺是舉也祝愛景之舒長緝丹陵之眷佑感鶯嶺之棲通眷冀方之純楸德施溥祈報昭典禮具矣時有東吳客卿言於三晉大夫曰蓋聞王者法上元以布化順黎庶以求寧寧化既浹爰周泰平選昔

皇上之南巡也恩覃淵潛澤洽政行吳嶽竦其崑岷海汜鏡其醴深腸秩徧乎纓綬貸粟隆乎坻京齟齬鮪背魚頰鳥旂職屬車之戾止邁五稔而於今矣大功者定諸福畢致

皇上歸善前寧祇脩肆祀左言君長飢屬陪位圓靈采曜總眷景瑞吳閭之民欣奉 明詔彳亍以俟茲乃命置吏戒前途建元弋張威弧揚青旗於井域降翠葆於參墟毋

迺紆句吳之隅望還於越之謳飲乎矧今者鼎錄絲延
國慶易奕星明龍角瑞應南極宜卽朱方以章靈契言未
旣三晉大夫有睟其容冰衿而晒日陋哉客之所聞奈何
以俗士之拘墟而妄測

聖皇之緯繡哉 大駕之展輪於雁門也非謂江介之湫
涓陬於河冀之廣廓淮南之靡麗侈於唐魏之樸藪也

皇上環九隩而光宅恢八紘以論都固將奉彤闈於南紀
沛渌澤於東吳宛宛淮濱古爲具區大雨時行泛於洪湖
竹落金隄夙稟 聖謨方庀材於禹績旋厘念於堯吁開

白臧而議振詔掌庾而蠲租猶慮 翠華竣止民或怠於

東作目眩於日華雲錦之賦賸勤分於牙檣絲竿之輓輪
疇咨守臣勿恃勿儲矧夫太原之域函夏所疆肆燕之右
睢洛之陽西控孟門伊闕文命所達中貫洪河以王百谷

下朝搏桑上應析木東則底柱析城至於王屋發祉崇域
太行是蠱衿四塞而控五原帶黃流而接恒嶽簾嵒嵒於
風詩現青蓮於乾竺伊耆卽宅文殊託宿陸海所蟠初地
焉屬昔豫遊於此都嘉閭淳之匪斲化人於焉示應景命
於焉禔福是以迴祥習於司南而宿星陳於代北也日在
降婁律紀少陽元鳥司分天旗啟明三辰邳謁四騏騰驤
抃畢彗灑翕箕舒張撞夾鐘之鏗鯨暢岑華之流簣逐道
玉河度蘆溝歷涿易狝

珠耶房山轆轤於薈標荆關博傲於巖幽龍虎蛻蛻而燎
燭日月滌朗而環扶乃啟

大安籙 皇衢猊瑤閭馴玉蚪屢思文之駿烈續下武之
鴻休寶鼎歆雲燐蕭燭幽鄔黍明粢蒟醬和羞宛馬彌髦
於璇岡闔壁令酌於黃流皇旄舞萬歲之字天子奏七始

之謳洪惟我朝

聖聖相繼荷天之休如川方至溯卷領與結繩前載莫之
能記懿王母之介福暨景員之錫類惟世德之作求遂於
鑠平萬禩

皇上崇孝感隆禋祀清廟時薦寢園歲蒞肅拜俛申優渥
宣光攄誠受釐錫羨其來有自大禮既浹時巡載舉遂
登禮賢之崇臺訪毓聖之靈宇拂雲縈之錦石挹蓮池之
清渚浮滹沱臨廣武鹿泉裊窕而周遊井陘巘岵而飛步
瞰射虎之平川契神武於

皇祖是時未至於五臺也經涂所歷黃薺刻刻翠闕芊芊
桃舒丹葭桺翬綠天桑牙鍼簇相乳星縣隄塹對列滌池
脈連秉穗棲畝儲穡盈廬腴腴垌牧鱗鱗茨椽士女佇眙
商賈駢闐接裳連襪晤於語言躋帷宮而蛾伏祝 寶厓

於萬年景彼珍臺去天一尺雰紺雪於皇初然神鐙於大
始奠五聖之高居環四陲而平坻中臺之頂上有華池二
里九曲注壑漸坻陰陽藉以吐納龍象據以躡蹠宰堦對
峙花龕四垂露凝脩掌地湧神芝東臨伽羅以臨渤澥飛
沫起濤登降陽采瑤姬金母海屋斯在耽耽北臺耆窟是
崇上欽天井下歆龍宮帝車中央旭卉周通西則蒼臺崛
崎祕魔之府豹子熊頭化城十五八功德水飲之益壽南
臺崩劣神龜所居餘方蓬之聖跡紵銅鑲於軸轡轂六星
之炳耀互萬嗣而不渝若夫菴藹檀林熒煌金地跨谷彌
峰七十有二天華蘆薈卉木叢麗柏亞走於宸遊泉酌突
於雲被交光孕色含幽育粹月面動牖而豐融星豪披局
而參繼黃輝紫氣雲屬波委此所以鞏衛於神樞而汁協
乎靈時也我皇迺陟璿霄升寶殿陵盤陀紆仄徑詣顯

通佇昭應考睇澤之雕鍾搏浮瀲之羽磬禮古佛於恆沙
證壽人之上乘星幢拂曙罕羽排空移輪月殿刻鏡花宮
慧鐙籠苾繡嶺呼嵩恆春絢碧不夜舒紅瓊香臺之銀鴿
蜿華葢於珠虹頻伽鵝儀於扇羽曼陀灑潤於旂龍慶仰
止於慈豫瞻睟穆於孔容葢以畜天休之保定而祝泰嫗
之延洪也於是坐布政之宮闕巡方之館升河汾之孝秀
進雲代之魁健戒良士以無荒仿唐風之節儉遂乃賚九
扈羨四岳別幽明躬陟黜壹軌量同衡律恤矜寡息老物
飭桑虞安井牧省菑畲補不足然後宴羣后振鳴珂餐元
氣飲太和昭晻匝洽毗庶驩歌詠康哉於茅茨頌卷者於
邱阿六飛迴轅雷電隱轡鉤陳司警皋搖抗旌止頓乎飛
放之泊揚褰乎燕趙之垆葢海接艦畫鷁連軸辟獨繭解
全牀張網陸御增繳周北際與南垂猶射魚於井谷川禽

馬二
四
畢羅水鳥咸獲螺贏鰭魴鱗甲山積巴歌飲唱權謳畢發
所以調蘭膳之上腴而奉

璿闈之嘉樂也且夫天子之制東龍西虎雲車月轡四極
四和惟駕所蒞豈規規於句吳之被其庶於越之霑其漑
乎東吳容卿旣間斯語離次降階神忘形茹日蒙誠懇忽
罔知帝者之上儀與天地闊聆大夫之言揚兮如日敢獻
匪頌以揚高厚於萬一其辭曰

維皇緝熙吉歲卜征江湖海壖佇於清塵百族殷賑偏隅
弗獲維

帝曰咨往哺以粟用戒俞騎改歲南行匪子伊後圖爾謐
寧祇肅穆清賁威寶命於昭橋山萬年有永迺錫吉月迺
撰靈辰載奉珠軒潔齊升禋峩峩清涼世尊不應神畿自
西千里而近斑斕雲從玉軌星馳展謁芻摩祇答蕃釐惟

天錫社踰三越五於萬斯年有秩斯祐

駕幸京口三山賦

於顯斗墟蔚爲岷江浮羣玉于朱方表堯闕于南邦扶輿
戴而爲三納鯨喏而疊雙衿吳楚之嶮介匯潮汐爲擊撞
我皇乃建珠旗束綢杠御安艫駕飛艘蕩四溟拓八窗
登神山之嵯嵯俯通瀆之淙淙爾乃山島竦峙大江中分
下臨無地仰矗梢雲闕幽崖于北府聳古戍于西津吸蒼
景以內照鼓殷雷而上聞固真靈之窟宅含元氣之烟煴
觀夫北固之爲山也天目流乳句曲分支月潭倒影柳溪
四垂很石類伏鐵鑊瀾微沙侵碕岸水沒落磯池平樹古
颿起泉飛走馬跳珠而成澗跨鼇臨闕而敞扉若乃下瀛
舊基獲符故壘玉柱宵浮金精夜徙火珠浴日而騰空相
輪連雲而倒水撐巖石之盤陀揭簾山之巘嶸其中則有

妙高嶙峋中沍清泚入江百尋去天尺咫曉堂龍出而電
挺夜渚豚翻而風駛此則金山之崑吼鏡海門而孤峙若
夫維長綯挂輶席越漩流經觥石入松寥之神山尋海雲
之佛國探獅子之靈輶訪沙戶之遺蹟青玉作塢而甌歆
碧桃爲灣而徑仄竹筱松釵濤聲嶽色棧簪梯盤岩轟劈
歷下瘞胎禽上摩健翮斯則焦先之隱居永寥軼乎塵陌
者也合觀其形勢則歸落奇拔輪囷嵒嶭雲根糾結督脉
縱橫障百川而東注揭九派于西傾日月蔽虧風雨迴伏
山臧寺而逾幽寺隱山而非緝遠而望之晶晶晶晶層臺
三成若岱輿之浮嶠出玉京也迫而察之嶽嶽觥觥碧紺
朱明若天台之霞起接赤城也其靈根鬱律猥積崎嶇則
赤斧昌容羨門安期之所居其水府岷詭頤洞瀾濤則奇
相海若宵龜長魚之所宅遂乃高閣神行精廬盤互江天

慧禪宅心甘露多景層樓迴瀾古渡蘇米爰遊孫劉曾住
竹院漚亭星羅霞布橫嶺成梁神亭無柱鰈井不波鵲峰
少樹海作堂皇天開桂栢洪惟

皇祖四巡景員導河濟江惟義所宣

銀榜璇題千山千川懿吾

皇之紹衣奉

珠幢而遊焉于時天融素練風靜脩柯纖塵不動翮羽相
和八神傳警萬靈不誑龍艘啟途鳳舄汎波千品萬官後
舞前歌觀夫禁扁星縣豐碑屹起維玉及瑤聖謨佑啟
景神堯之孝德貽駿烈于豐芑爾乃寶掌蓮開鐘魚響荅
禮大士之鐙龕埽頭陀之梵塔祝萬年之綺甲慶五緯
而相叶若乃江魚白白竹筍青青絲絲柳翠點點桃猩藥
闌釣渚岫幌巖扃用以調法膳之芳腴奉

慈豫之平寧更有飛雲蓋海蜀艇越熊羆渠七札魚甲萬
重射潮强弩沒羽唐弓鯢鰓泊浮茶火耀空羽旄揚蕤鶴
列霸風所以陳師按屯輝威稜而詰兵戎也至若雀舫千
艘羊鐙萬炷金蘭玉蛾銀花琪樹張水嬉于顯天之臺陳
火戲于閭風之宇則以勃律干闥之壤纏帽鍐百之徒越
二萬里而來王載之後車俾之豔蘇軾之軍容震簫籟之
權飲炫魚龍之妙技飫魚鱸之行廚也豈以是爲靡曼窈
渺習耳目之娛哉爰乃下 明詔諭羣列徹曼衍捐燕設
嘉山靈之樸屬但簪灑而可悅其勿侈于金腹雖成事而
更說慮大江以南儲峙是營而東作或輟也惟是樂民俗
之含和慶天宇之時暘睨簇簿之春蠶驗柄畝之餘糧慰
山氣之夕佳信海波之不揚然後酌汎醴烹靈液剔鮮斑
哦畫壁拊玉帶之珠腴辨古鼎之姬嬪翻義獻之經幢撫

華陽之銘石賁三詔之幽局弔四雄之遺蹟奎章藻朗于
丹楹龍文震蕩于靈魄將以絢鴻筆于貞珉紹殊微于玉
策

駕幸鄧尉香雪海賦

景鑠宸遊藻山儀川惟東皇之嘉樹幻陸海之殊觀爾其
錦峰以西光福故阯昔有仙尉栖遁于此一水一邱十里
五里虎山之庵爰架石梁上下異名東西殊方白波翠巘
玉柱銀房風雲通其呼吸岩谷秀而昂藏支龍盤互洞壑
峭靚聚米成山范銅爲井突兀龜趺空嵌塔景西南六里
是惟萬峯丹崖紫閣文石貞松千頃雲光一嶺湖容若其
踈傑閣之嵒嶸聳檀林之嵒嶸蹲獅子之幽龕雨寶華之
靈穴假山疑出于人爲佛益似仍夫地設峰峰殊狀七十
有二冷蕊疏枝彌天際地登吾家之繡嶽爲眾香之薈萃

蓋香雪海於是乎在焉爾其植徧重巒栽同萬綠潔洄左右之溪覆壓高低之谷神仙姑射之容風雨羅浮之屋當夫春日始和芳林初絢艸未敷苗柳纔添線睨睨調鶯參差度燕爾乃霜苞含秀絳萼舒英微捎崖砌薄籠山楹訝冰綃之乍展凝練影之將橫至于華旖旎而繁開芬縈紆而絡繹阿囀則豐玉琳琅瞻山則瓊敷玳瑁玳瑁而覆地而同雲旋連天而一碧其爲狀也紛紛鹿麕如百谷春潮隨隄踰岸飛十丈之銀濤近而矚之氛氲淑郁如龍公試手撒鹽飛絮雜冰鱗以迴錯驚飈乍過掩抑交柯又如頽波激宕而婆娑麝月初來倒浸呆思又如綠窗入隙擊空明而濯纖埃碎影穿簾餘芳透幕髣髴乎渤澥之一勺落蕊谿填飛英逕冷依約平溫淡之萬頃故其掩冉非微芬芳布濩氣鬱非蒸烟濃無炷積凍雨而常晴捲靈潮而非怒海

鳥見而忘歸白鶴翔而起舞偉瀕洞之奇觀幻空濛之靈
宇信乎六出廳簷壽之香而四溟有清虛之府也爾乃列
花間之帳殿披林表之帷宮泣金車于繡嶺駐玉轡于丹
峰仰觀俯矚春光容容雲謁波詭日麗華濃芳凝榭遠碧
映潭空皜皜無極浩浩焉窮甲煎之烟縹渺水晶之影玲
瓏前臨具區以觀於廓荇藻繽紛魚龍騰攫歎欲百靈包
臧萬壑冥晦無端風雨閒作蘸澹漱之飛流與茲景而回
薄光沈白玉之闌色借真珠之箔已而脩巖轉旆磴道迴
鑾旁趨梵宇徑躡禪關青松偃蹇翠篠檀欒香氣則林端
乍湧壁采則杖外猶蟠抑臣間之觀海者于其始波聽雪
者于其先集占花信於梅梢每燭燭于啟蟄惟被勒于春
寒斯將開而未及此有色之妙于無恭述御製見圓靈之不相
襲雖日受之尙餘然鼻觀之已入奉宸藻之疊賡俯羣言

而高挹矧夫周遊原隰遍考圖經辨岡巒之起伏審嶧屬之異形將以尋溫曆于岩谷溯濞汭于滄溟則天章之寄興又何異于蜀阜之顛與孤山之垞

駕幸棲霞山賦

臣謹案圖經棲霞山在金陵郡東北廣輪四十里時百三十仞較牛首古稱天闕殆又峻焉固絡良常而帶垞亘鍾阜而作鎮者也

皇上觀民展義吳山越嶠罔不輟環回車金陵六飛駐勒憩於茲山於時需雲被黃惠風灑塵鵞龍蟠輪而挾輶白虎敦圉而扶輪唐哉皇哉誠足以炳軒圖紆堯文跨崇嶽儼厚坤矣小臣禱昧陪從屬車聊自託於吳歆詞曰

棲霞之爲狀也雙高對待三峰牙錯圓靈清寥方輿隋削羲娥之所蔽虧風雨之所迴薄神靈之所窟宅跋蟻之所

栖託彌日旣月尙不能測其垠塹其顛則有最高之峰攀
闔闔其可捫臨長江如畝邱之橫縱下瞰太虛之嵬亭卑
之已迴出乎雲中中峰之麓是惟蓮宇昔明僧紹棲息之
所松桂與栖媛鶴無忤爾其入門則見廣場宏敞坻堦恢
台萬馬雲屯九楹弦開活活清渠蕩溢滌埃白石朱闌采
虹滌洄渺洪波之滌漫原屈注之所纔於內則阿育山龕
優波禪窟靈鷲翺雲天龍浴日參八會於恆沙挂三衣於
丈室其上則紫峰在焉分函關之秀靄擷御宿之菁英儼
脫穎於重椒峙斗極而孤撐構傑閣而臨眺含石氣之餘
青落霞飛而蒙眇翔鸞顧而竦兢西則廣殿無梁場基無
礎金容丈六一區百堵梵銅千像製自蕭齊珠衣華鬘履
綈蹈嶠拈蘆擲益連岫依岬結跏花放拂指峰飛其巖石
則犖峴異名室隆殊狀背若相忌輅若相向厥有天開太

始所創摩五丁之遠蹠故盤拏而屈強宜禹蹟之所過勒
 科斗於其上疊浪之崖奔騰岩峩怒濤起而雪飛倏中判
 而夬𩚑肖鯨魚之弄潮若陽侯之汎宅駕一葦以思杭曾
 不知其化而爲石有頽者弁列於巖端帝庸作歌錫名
 玉冠釋筍藎之固陋服昂收以節觀其流泉則玲峰珍珠
 品外白鹿度春雨之宛虹紆石梁之臥綠汎析木而下注
 隨盤渦以詰曲光亂鯨星韻碎寒玉於菟伊尼蹴踏踈蹢
 更階下之流甘景翠華而縣瀑同玉膏之湍溢洗下方
 之病濁此固分功德之遙源宜足荷宸章之更僕者也
 其精舍則幽居德雲別屋𡶗分鄰桃萼之古澗疊錦繖之
 圓紋荆扉筠榭太樸不文幽幌局而落逕闢喬柯靜而魚
 梵聞貞松所植枝格菴茂蚪或九枝翳或萬樹陰樾成雲
 滴翠成雨倚霜榦而誅茅紛上棟而下宇其他因樹安寮

隨流施桁滑笏流銀浮筠承絢時七級之相輪建四禪之
下院皆擢秀於巖扉而稱雄於江甸木則樛蓼蕭穆千尺
百尋絡幕如蓋交橫如簪艸則薊竦結糾緣崖列漱散不
爲脩聚不爲莽爰有藥苗茂於幽巖松液所化神磨所銜
維茲山之得名由攝生而靜參更有珍禽異獸穿岩穴岫
迅獲捷猱踰伏响茂迦陵之鳥交吭般若之禽引脰用是
憲背陬建 紫宮樹翠罕炳金釭結標平碧移編砌平芳
叢由闌而排嵐采環櫺而漾溪風祥曦內脰流景外霽渟
芬揚藻搖星印月我

皇睠焉 大駕爰陟爾乃披桂椒登岩岡秣馬於芝田按
轡於蘭唐煥龍文摘鴻章采仙崑之靈拊祝

璇籙之洪長遂乃飭林衡簡法從覽報章戒滯壅課疆吏
之奏績第艸茅之嘉頌斯土壤悉登於維嶽而苴若不遺

夫采葑也爰作頌曰

攝山隆隆冠於南州 帝闡靈繹以助以遊泉流丹沙溪
浸白乳曼壽是徵衍於瑤圃有鬱斯樞有九斯松 天子
萬年惟茲山與崇瓊鋁麗輿葩瑤紆旆歲來茲山淥澤沛
沛

駕幸熱河賦 謹敘

臣星煒謹言臣遐稽前載青林爲天苑司馬遷八書紀昴
畢爲天街主弋獵明王者省方表貉必有置頓之所以詰
戎肄武古稱梁騶詩詠甫艸其義一揆然皆近在邇陋甸
畿以外卽甌脫置之豈如我朝

聖聖相繼高昌大食悉隸司民之版其視興中舊壤子姪
以來不載於職方者特爲京師綴旒

皇上歲以秋七月獮禽於木蘭卽離宮而止蹕焉

慈寧燕譽之歡洽藩國輯瑞之典行臣工述職之事備皇
哉帝者之上儀已臣惟選昔都會之地其臣多形爲賦頌
鋪張盛軌然相如賦上林地不踰長安尺寸而盛稱蒼梧
西極不已惡乎臣嘗從、屬車快觀景鑠今年職當隨扈
緣奉使未果而心儀上蘭之巨麗典文之該洽不揣樛昧
摘詞以獻義取摭實無敢溢美曰

於廓輿桓包乾度於北陸之中涉尾歷箕跨躡漢津浩乎
蹶通之維鴻濛焉莽賈焉實爲與區皇遠隴關闔越禁垣
不十舍有奇殆又近之是曰密都選者弗卽宅殆渺有汴
干員祇言眷 敬聖爲我獻貽爾其地勢則畱幹亘其南
臨潢枕其朔大柳東屹藁桑西瀾巖院塞之林林賓陪京
之嶽嶽盧敖之所跼蹐豎亥之所揚推其山則嵬峰直上
取象罄鍾作鎮左方玉以振之觚稜闕景若華銜暉翼以

金黑纒連牙時元磬侔色浮玉庚理應眞結跏而敷坐毘
 盧峩冠而竦翠天橋獅子雲蹲波詭蜀或一拳繹則五指
 石梁千仞蹕路所經爰躋嶒嶸嶺嶺於廣仁昔也棧齟今
 也砥平亦有鄂博莫之敢指量樊揭虔方望所視其餘七
 金千佛之差峩偏槍德勝之隱嶙垂螺丸之窟窀茁芝房
 之菌蠶爲宮爲霍連蹕而獻狀者非摩醯算固所能盡水
 則溫泉瀦瀦勃蒸丹沙濫觴墨黑瀉漚熱河經碭基歷周
 阿流湯湯浮峩峩翼鴉鴉介麤螺角菱茨攢蔣莎宜靈液
 滋醇和又有伊遜九派沱泉盈缶用配於京罍以銀斗康
 王揚子揣稱與偶考水志於酈亭醴灤河之分道紛武列
 與索頭羌同源而殊號白狼參柳鮑耶丹花玉瀑飛流敖
 漢所家日孟廣嗣霧靈際蟠叶行地則伏遇坎成科侈博
 頰之衍斥滄川氣之流氤鬢羊腸之詰屈鬱龍湫之淵深

埒神委於通瀆方河濁而沛清其植物則耿耿元蔭蒼官
五蟻或爲杉身廩秋脫葉人楓仙檜稊榆鱗接桑牙蘆筐
柘枝拈拾匹以構蠟蠶功用給誰樺則烏號之用根槿則
魚網之設芙蕖暑豔落英晚芳棧桂皋塗蕙蘭澧湘灼金
蓮華產自清涼與北天竺同皈依香秋英九種粉本徐黃
蔓青寒疏艸荔果房巨如棗實綠則瓜瓢舉一彙百縷灑
渺詳若夫荅選巴攬普盤櫻額烏沙爾器奇石密食雖稽
含之與衍張華之該洽叶曾數典而如寐矧拘方於遠跡
其動物則剛蟲彳阜醇駟服阜盤羊封牛貍狸票狡犢犛
谷量豸豸苙擾颺鮑紫英飛狐皛縞有堪達罕其角斯趙
叶鞞材孔良象齒非寶羽類則鶴子南飛雁王北向候燕
春翔元鷹秋颺晨鳬瓦雀翡翠異狀野雞火雞脩紳員吭
徵瑞紀於鷄鳩尉候徹其亭郭鱗則濡河之鯽芼以山膚

有若漠鮮狀似松江之鱸析綠柳根潑刺乎清渠食經是
殫實繇有徒繫惟演天根縣地絡苞歲貊緋白沃荆令支
昭昧谷纒九野之飛征鏡萬靈之旁魄昔陶唐氏有此冀
方遂克經蒙穀委羽而疆以戎索禹相九土窮髮爰宅賊
重趼而弗之遺神皋於大莫繁白檀與柳城悝地志之踳
駁楹烏桓於爻閭揜鮮卑爲蕃落降自元魏甘松荒度中
京肇于耶律歷金元而式廓嘅勝朝之迫脅造艸昧而慝
作委三衛於鳴鏑曾挈瓶之弗若天佑
世祖鉏櫌槍埽荒屯襲嶮介考廣輪厠悖碣駐廬城俯八
紘協四巡用授我

仁皇遂闢靈囿而恢景員夫何擊縣野爲堂皇今吞虓池
嘔夷而罔有芥蒂也挂天弓于納哈里之崆峒鵲謁兮飛
鏃飲羽而軼其背也準紫宮而營室分標景六六而未有

艾也歲幸上蘭闕如是燔詐馬頭鵝犀毗寶匱兜離名王
搏頸排籤絲纊比筒觥齒養恬垞租場租資與丁男闕不
譏征農貲算錢規北垠納不周之風者六十有一年維時
文孫之繼聖已司契乎昊乾遂乃闢松館爲東序而毓德
焉

憲考勤恁省方匪暇洪惟我

皇亭育函夏稽虞箴於周雅憲菁陲辨方野優靈衣之月
出儼神御之式馮度九筵於重屋時宰堵而按層單墀垣
之潔祕趙櫺額於紀恩言奉

慈豫非雕非斲六膳旨羞九韶郁穆山齋清聽松吟鶴啄
於前則岩闕登閣麗正當陽德匯碧峰高門有開金螭
分濟濟朝堂虎威章溝微道周防澹泊敬誠制撫未央
御勤政萬幾勿康然夜亮之貞木朱丹炳乎報章左則堤

沙潭之宛宛兮撻石林以相屬構清舒靜好之閭闔兮架
樂成之飛閣叶徵湖竄繚垣而東注兮竦芝英之綠緝簾
三州之象方蓬兮彙星源于巖瀑寶坊揭其業業兮長虹
宛而電爛右則栽九雉之垣蕩兮黃緣入於西峪松榛梨
樹莽蕞以被岡兮堂秀起而創得叶靄玉岑之精舍兮滄
浪翼然而縣出叶於後登石壁之巒岑兮皴樊桐於畫幅
兀孤亭之陵大虛兮枕雙高之丫角內則厝厓與窈青瑣
對廊山心水心蘋香蒲香籠嵐氣于疏寮約雲容于紀堂
宦光寒山雪屢移維摩輞川圖莫詳別有徧金布埭萬樹
之西二廐八坊考牧於斯畫肪青雀沙棠改爲秋宵汎月
安臚似之若夫檀林鷺雲魚鯨互荅普寧安遠周廊八八
摩耶都綱仿固爾札貝渠降人隨瞻步路矚犀角之七屬
警神武而不殺復有清都太微列僊之庭桂棟蘭橑用醇

湖靈斯固剗巖辭而架厂順停似而爲壑鼓蒿宮爲已倍
視青陽總章而猶樸

皇帝乃順金行之孳歛乘萬物之權輿屬方神敕林虞樹
元戈張唐弧載鳴鸛駟駟駟揚旌夏建祀姑簡皇寮選烝
徒裝綴離摩軫輻輳盧鳥鳴秋雨洗車祥風翬輪華黍載
塗首頓順州爰止庠奚載見噩吏民言是咨義義古北夷
庚天路堯閭洞啟屯營密布桓桓禁旅斑文孔武翹關折
射十千其侶朱提忤戴情醪酣醕爾乃歷鵬窠之峻嶒轆
轤匠之豐形越上陘之芳嶺梁墨蚪之嘯嘯鵠訾黃于墜
道盤十八而不可窮維時釣耆鰈得大祿岑陬之君鄂畚
槎祲蘇對沙那之臣衣賸冠哈邦鐸百梟矚左言孔殷
乍伯暨而發猷旋頤頽而躋仁蜷區陬而蛾伏咸擁篲而
埽塵景十華兮如日暇六提兮如雲

皇帝止輦此焉清暑奉金根於詰旦道揚山兮是取冀止
頓之少紆慶

慈徽之多念

璇闈靚深而攸芋喜焚熟之退舍中命大僚班見羣吏求
賢審官厥庸孔肆申命藩衛慎簡介士廣場并夾羣力是
試申命納言閣郵無滯銀豪批荅中宵七起然猶矢遊歌
於有卷俄干詩而百賦遑遑八伯技窮于賡載二王腕脫
于豪素矣仲秋之月芳觸旦中老人見於弧南占日壽昌
萬寶屢豐稗王大長賀 聖節者重九譯而道通先期挾
日 詔駕行啟龍樓陳曼延集佖優舞折盤嘈觥謳騰騰
踞蟠螭蜺翩躑躑鳴秋秋下品授饗八珍和羞尙方賚其
珂玻瀛海溢其觥籌逮旬有三日夜未啟明

皇帝輦玉輅於東廂企葆鸞鳴儀鎧肅拜頤裕壽康然後

設九賓御行殿張赤帟義會弁郎將侍司儀辨籙露垂精
夜絢鞞轡任休執其壤奠地萬以二數猶有羨爾迺金韞
告中露白葦蒼龍沙戒寒鴈磧早霜伊尼孳尾撲握脂膚
四十九旗獻其虎貍短衣控弦爲王前驅迺千有二百人
心雄萬夫 天子乃戒俞騎徹亭埃倚飛雲綏華覆 大
駕幸乎木蘭憺稜威而奉辰牡緬夫木蘭之爲地也砥乎
駁駁劣兮豈岌泮兮絳熒嵌兮曲岬徑輪數百表廣倍十
曩北庭之垆收嗣納土而從獵樹柳條于四隅扼厓口于
一髮叶伊絲尊會極之義巴顏麥富秋之獲興安大嶺嵩
華旅捐僧機雙松夷齊卓立色勒朱蘭河源是翕龍堆象
長城之蜿蜒實非嬴秦之郭郭爾迺迺起起伏飛向晨陟峻
箕張翼舒鵝飛鶴從和門大張幔城正中絡以網絲綸連
鴻量建吉爾丹樹羽童童有正有鑠八旗會同皇御鞞橐

感渥恩列肆筵張樂顯天之臺銀宇流晶穹廬蓋天烏螺
翠椀桐乳割鮮只孫式榜土鼓皮弦撲毆矜拱敎馳騰翩
檀末之技同人擅焉其鵠師赤迅於飛載遂乃紆華旃御
行幄醺羶薌厭潼酪卻乘黃茲白珥旌鼉封之貢頒麇麇
獾羆獐羆獐獐之獲介特左肩銀鏤右簏越穀齊烝津津逮
圉牧而後回車隆隆振振鉤鉤戈甲繽紛骹屬而還凡此
者所以芟廣甸之灌叢奉色養之怡愉示纘武之令間裕
邊戎之遠圖而非以射中獲多謂可奮太武而威遐邇也
山莊密咫尺省烏可以已哉且其監司丞倅府署碁置統
軍將弁扞城列峙則設官之準乎內地也隄塍相轄赤壤
黃壚上軌自倍春稻秋稔則代田之蔚爲上腴也富中之
氓九市帶鬻穰塲組文影纓駢轂則財求之達乎四隩也
閭閻櫛比耕牧永安則唐魏之戒乎遊盤沃饒近監采山

擊鮮則青兗之驚乎魚鹽不特此也往者西傾經武昂吉
款關四衛務面見於塞垣遂康戎功犁獲其大醜于拔達
克山至今達什達瓦連襪闐闐荷戈鋌而爲臣僕者數騎
莫之或先則是山莊爽塏降人是居宅邑畋田供其租銖
藁街之邸莫能及朔方之域無以如又何朱波驃甸之不
可募箠使之羈馽驅之也哉

聖駕巡幸盛京展謁

祖陵恭頌 謹敘

臣聞八音出震斗車指天首之星五色滎河金籙縣帝垂
之室溯白鳳分元扈襄城祕蘭葉之圖龍馭璿臺石紐駐
雲螭之駕姚墟嗣服纂靈慶於丹陵蒼籙升壇衍貞符於
翠渚高邱襲祉名都列七相之華大子登歌殷薦嬋三雛
之盛用以合歡寰甸丕顯文謨日月銜珠光啟龍興之宅

蕙蘭成路祇迎天步之區至如徹迹方開絕徼則銀麇入
貢車書欲遠流沙之澤馬先鳴輯玉瑞於塗山防風納賚
席蘿圖於涿水濁野請庭天乙四征鯨盾來於東面雒鈴
作邑雉翬班自南人揆厥所元於斯爲盛欽惟

皇上乾維御寓鼎位凝休三筴長垂永禩絢蜺裳之采萬
靈自總環瀛肅夔鼓之聲乘木德以司方津覃蟻垤肅金
行而省歛澤溥鵷林鴻寶九疇衢室發天文之祕雞渾七
曜金徒候日吳之勤岱頂嵩申獻祥書於鑾檢吳歛越唱
遍謠頌於朱垠洪惟神女降祥大東卜宅真人建業朔易
開基綃帳葛鐙陶穴本堯門之舊璇宮銀洞祠壇閎軒鼎
之遺載啟

文孫誕膺成命循上

陵之懿典摘賦海之鴻章幽館玉瑤常陳 皇覽蕃方傑

休更竚 帝臨爰於鳳紀之周星再見鸞輅之動地若槁
似火迎葆衛以舒紅莆蕙成茵列旌門而映碧瀾魚入饌
清宵侍

天母之筵塞馬傳書乙夜省臣工之奏時維六月 駕幸
山莊瞻翠琬而光闕 聖圖撫丹楹而導揚祖烈赫曦歆
景不臨清暑之宮仙掌修莖自沚招涼之館鍾峰轉靄披
爽籟於南端獅嶺蹲崖摘明星於北戶萬壑松濤之聽戶
卷陰雲四山乳脉之縣時移火樹沿堤芝逕蘭華自綴於
文機曲水荷英珠葩紛披於鏤檻平沙列幕雲屯朱汗三
千夾鏡重湖屏列青芙十二軫祁寒於版屋坐燭蜩巢勤
布政於瑤階躬釐鷁序綸連 聖藻丹青壯寰宇之觀啞
喀天歌宮徵發川原之響維時夙沙勞面煎鞏披忱春雨
自零戀煥之禽先集秋霜遠擊懷寒之馬知歸矧夫鳴鏑

之驅除焚巢潰卵遂乃款關而招伏食黽懷音引領虞干
不陳露犬紈牛之貢投身湯網自厭焦頭頽尾之勞降書
已達於帝闈亭障遙傳於邊候天垂解澤魃魚鳥於滄溟
日擁霄雲靜蜩蟬於莞簟霞漿玉醴與沆瀣而俱傾鳳管
龍絲雜鐃歌而並奏班璜授賞文身資章甫之華胙土論
功折箠拜眞王之貴鑑宵燕集煥綵樹於長離綺席賡吟
綴華璫而合璧洗兵戎於瀚海簫勺同文徵尉候於流沙
昌弧奉錄律移無射令轉蓐收乘萬物之權輿展初秋之
法駕鉤陳清蹕山祇夙戒於非煙俞騎前驅行幄先成於
匪日披星結軫辰旂指析木之躔向夜傳餐月駟薄搖光
之舍名王負弩捍牧圉於陰山迺卒周廬掘鉤鈐於乙帳
文驪赭白攻駒苜蓿之園桐酒黃羊式燕琉璃之醕平疇
艸淺正騁驅逸足之場玉宇涼高肅鷹隼陵霄之廟會烝

徒而表貉列缺騰鞭周嶽嶽以展輪豐隆夾轂駢弓手御
扼狡獸於崇岡黃矢親調殪剛蟲於邃谷螭騰蚪踴聲傳
天馬之嘶虎攫麟超雷動王師之氣義陳舜甌驍媒辨由
鹿之音瑞兆姬璜釣渚叶射熊之夢數大庖於吉日獲必
疊雙校簡力於長楊吞其八九京薪爛朗獠徒識荼火之
容陸網昉分穀騎習鸛鷺之嗽觀風皇澗入豐蔀而其咨
駐罕周原考前經而於邁爰諏良日載埭吉林碧柳遙看
北戒合元都比景白山凝睇東封與日觀同尊熙景祐之
裁基祥徵帝武瞻溥原之式廓戶近神樞衿百濟之雄封
納三韓之王氣森蕤木葉承御輦而敷茵澹沱松花漾
宸旂而滑笏長庚屈節瓊廬騰萬歲之呼韶齒迎鑾金版
紀十年之聚肅鳴騶於砥道栖畝同雲詔省歲於茨椽
廣場比櫛霓旌沛艾經粉社以周遊鼇紀環維謁珠耶而

將事瞻言楫桷申孝感於履霜省識陵園峙神遊於在蠟
重旃曲蓋黼幄森陳朱艸華平橋山夙植奠椒漿於銀甕
竹葦流膏颺樛燎於蕭光毛魚列鼎冠華秉翟總干陳大
武之容嚴鼓鏗鐘縵瑟和咸英之奏犛牛服輓歸通駿於
前監卹黍奉盛告屢豐於十稔鞞琫容刀之飾舄奕如新
櫪楮伐木之場青蒼逾昔緹箱累襲啟組練於犀函筍席
捐雕樹崇牙於鹿角儻徊左序卿雲紉縵之章眷顧靈衣
赫韋帶裳之舊紀威弧於參伐榦合蘭筋策大白於駟房
形鐫石馬岩巽樓觀鳳皇接翼於

慈輿掩靄方壺鮫鱗恬波於 聖錄桐圭作瑞奉璋先麟
趾之英雉幕來賓飲福列燕毛之次秀眉紺髮斟綠螯而
酌縣匏玉藻瓊敷絢丹騰而摘寶篆恩孚棘土張疏網於
秋荼頌溢歐邱靜催租於夜柝傲顧鼎於屬紀績媿朱宣

均挾纘於雁臣歡騰清籞慶霄禔福薤菜而禮百神昧景
垂休芾艸而修遼祀入新豐之闐闐雞犬知歸同在鎬之
燕遊魚龍不去然後斑文轉駕鏤象回鑣萬雉當關鐵嶺
之戈鋌動色雙虹夾道陵河之簫鼓無譁宅太紫以停旒
淵涓齊量御訾黃而載旆月蜎出庚般裔來遊沐融皋而
澍渥昭晦旁達歆協氣之棣通臣未奉 屬車幸依仙杖
際居南紀瞻北極而先傾陋比夏蟲聽春鯨而率舞陳詩
清廟敢云小相非能結想卷阿敬附矢音之末謹拜手稽
首而獻頌曰

帝薦蕃釐天垂寶命朱果開祥

丹陵啟聖八部龕夷三階篤慶道契銅渾功參金鏡

其一周

邠考室漢沛歌風重欄祕感寢殿臧弓魏連峒嶺儉合蒿

宮高山荒度豐水攸同

其二

歆祉膺圖華旆曜采巡洛禮河

導江觀海風舉時鯨天行道在吏礪平端民懷幸覲

其言三

稽往牒日止陪京瑤緘考懿珠典昭清節莫旋易歲籥載

更禮隆報本契合感生

其四

澗戶延熏霞莊澹暑蘭茝池臺

松篁棟宇景福裁基渠搜卽敘治洽前文光施下武

其五

道

遊星指陸櫓雲垂景員廣漠朔野逶迤言瞻複廟載啟端

闡邠岐方駕鄠杜同規

其六

禹蹟四遊義壇六位懷柔孔延

禮樂明備葩瑤葳蕤庶旄琴麗用配於京永錫爾類

其七

景

炎於鑠文軌溥將鐫芳玉鉉襲慶珠囊金船起陸歆鼎升

香大矣孝熙承天之況

其八

聖駕恭詣 孔林恭頌

謹敘

臣間巡河拜洛七聖近接於駢駟肄雅歌笙二仲薦陳夫

牲帛榮波紀鳳祥徵元扈之文岫嶺御龍光顯靈威之錄

自夫重明協撰契捐元包五老降庭道宗至聖中天振鐸

珠衡集墳典之成修夜向晨韋策闡雲雷之祕參神揆訓
騰紫氣於長庚保斗橫經運元符於太甲石臧閱環林之
宅魯殿高驤金絲鳴闕里之堂殷楹坐奠則有司空致祭
大武陳犧釐祀典於投戈備宮縣於徧舞介圭紱冕青社
始建裘成秋禮冬書絳祿頻臨首善尼峰昊上熙幽贊於
時讎聖錄延洪際昌辰而道泰欽惟

皇上日曜同儀天文考懿笙簧古訓探蹟象於義圖陶鑄
含生納中衢於舜甑顯謨承烈丕闡帝圖定禮裁詩優躋
聖域崇牙秉翟歌魚麗於三讎黃瓦朱榱建薺標於數仞
鳳篆煥璇題之色翠琬鐫芳蜺鑪迴日觀之煙蒼祇戒道
用是靈承鴻祐鞿轡景鄒魯之風翕集蕃釐簫勺奉鄣謹
之籍神稔密運馳玉斧於西傾乾絡環維建珠杓於朔易
黃圖卽序鯉魚清假邸之妖赤羽初麾楛矢輯中區之瑞

通駁籌邊之略熙鴻號於

璇闥若稽在泮之文繫箴言於石鼓泰壇報祀六宗並舉
於升崇黼殿承休

九廟均依於主鬯猶以八神索饗凝旒先太史之宮四岳
時巡嚴蹕首空峒之駕爰諏柔日載展華旂馳月駟於平
泉芑田不采奏祥囀於行幄饒吹無喧夾道春旗青入帝
絃之藉周廬羽葆晴熏岱畎之雲增崖鳬繹之峯嵯峨兩
觀夾鏡汶洙之水滑笏雙流蓋鸞路於昌平駐虹旂於泗
上緇帷文杏承玉軌而豔發丹葩太澤蒼麟御金根而重
披繡紱九微明燎騰寶月於觚棱百和祥熏汎崇蘭於藻
井泉沐淨淥玉尾流緹盎之膏砌璉豐盛彤俎薦菖蒲之
菜握文履度安像設於重欄仰矚高瞻晤師臣於前席元
纁織縞靈衣仍惡紫之風繼瑟鳴琴神聽叶聞韶之奏於

是堂升詩禮閣倣奎文綦組肆筵見象環之五寸玉書探
策抽鐵撚於三緘環壇珎文登之華方疏礎潤左紐作青
銅之色古檜芟榮撫欹器於珠盤校漆文於石壁緋羅香
藥藻耀丹楹曲蓋流蘇葳蕤廣殿沂童六七聽天語而盡
發荒屯闕黨三千荷 皇儀而俱歆芬苾爰迴 清蹕載
過 孔林殿樞火於雲臺斟桂漿於瓴甓平川繞砌經遊
臥斧之封文艸周阿肅下重茵之拜輪囷直木疑從天杖
以蟠根霍靡靈著先識 御容而孚甲聽好音於飛鳥筮
協從禽驗朱甲於華萍祥徵益地推恩四姓均承宜爾之
詳上祀五王用慰宗予之慕赤舄禮東蒙之主考度姬文
朱宣臨少皞之墟授時金籙仁施匝洽普大愷於昭晡瑞
牒宣臻迓純休於殷從臣片言莫贊小相非能肩摩孔卓
之牆歷階無自目極 帝臨之宇跋景奚從敬竭涓涔導

揚乾則頌曰

社斗凝暉河圖錫命光啟璿衡輪明金鏡靈時受釐蒼符
紀盛經德援神維

聖繼

聖其一時中合揆性道間知羹牆舜抱琴夢孔思龍麟彤飾

羽葆森粲封山輶瑞幸魯尊師其北燮南諸乾維坤戶參

伐銷芒闕門息鼓憬彼鞮譯格於干羽帝用告功維天

維祖其嘉籙列陳蕭煙孔揚名山肆祀吉土以方淑問有

嚴睿錄用光迺駕茲白爰御乘黃其愷樂敷天歆謠萬

井揚越樹領吳閭引領念軫納隍情紆望幸考禮東巡揚

輪春省其旗舒行殿帳列帷宮紅葩裊露青剛時風霏霏

占麥驗律吹桐煙凝朔漠禮展大東其紫殿扶輪瑤樞啟

闡薦藻芳腴沐蘭燭潔籥舞冠華金鏗應節霞建鴻標銘

鑄峻烈

其七

謦文啟鑰龍戶非煙圖疇蒞洩雅頌言宣龜山

峻極聖井淪漣天步遊歌魯道砥平

其八

切嶽璿岡環流瑤

闕璜玉宛陳榛蒿自弗儀馬駟驪丹其蔭蔚景祕松篁花

紆林樾

其九

霓旌北轉芝蓋春明平遠皇夏荒憬由庚鷄林

納黷鯨水輸誠天地竝貺嵩岱勒成

其十

皇上三幸江浙迎

鑾恭頌

謹敘

臣聞雲祇夙駕員靈呈九圖之圖乾曜象符泰媪賚十華

之券鈞旋轂轉肇定三辰相土居方爰周六幕歲逢單閼

春皇升敷教之臺厓會良維蒼帝御結元之輦登封岱頂

輶龍馬於嘉壇發軔峒山受螭虹之瑞牒河宗刻玉榮光

降五老之庭洛汭披圖縕瑟叶九招之琯籥標駕龍龜之

國載紀禹功梯杭行日月之旁誕膺子錄雙蚪扶轂會萬

玉於鈞臺九雉儀輦禮百神於喬嶽遐稽邃典六飛傳龍

御之文近考祥書五繇叶龜言之吉其有純熙錫類荒憬
蒙休艸衣木食之毗咸歌帝力縣度繩行之域盡佇宸
遊遂古之初於今爲盛欽惟

皇上對元馭籙則大陳櫺紹峻極於前靈璿樞配極慕慈
愉於永日金兒承歡黃斧握圖亮績穆清之宇青絃秉耒
求靈昧莫之垆汎普獲而無私運陶輪於不宰雖裳錦爛
彩燭三霄夔鼓言傳聲聞萬里猶以蠅涓螻渡難忘七起
於宵衣魚頡鳥旂用慰一遊於夏諺庶彙衍珠囊之潤槎
檣覃津四溟仰瓊鏡之精幽遐荷照躋藩興王之地蕭鬱
升馨臺懷佑聖之區檀林贊佛修莖高掌聞萬歲於嵩雲
曲蓋流蘇訂六經於孔壁乾維坤絡兩駟兩服之閒帝驟
皇馳四極四和之地矧夫瑤房砥室編於牛斗之區銅井
鹽田近在越揚之境瑤琨入貢羨天府之殷昌悔嶽駢清

跂鳳城之巨麗曩自昭陽之歲首駐雲旂暨平疆圉之春
還鳴蓀份福我壽我登跂喙於春臺風人兩人運胎萌於
帝壤桐華再閏卜征申重巽之文瓠子初平客岳下輔國
之詔時則

璇闥介祉繡甸臚歡絲聖錄於先辛書呈金鏡祝

慈暉於長至日永銅渾爰晉黼帷敬熙鴻號塗金篆簡若
華流綯於丹膝渙汗絲言閭闔銜芳於紫鳳泗濱拊石八
音諧瑞鸞之鳴左蠡浮鐘九札協華鯨之奏花葩五色綵
結恆春嶽瀆萬靈圖陳難老藥宮籲俊熙介祉於修文崑
嶺摩崖紀微猷於大武酒泉供醴西垠疏蔥嶺之源火微
銷烽北戒徹玉門之限魚鞞鋤醬同闐辟以奉琛菌鶴執
牛共宛駒而考攸闕花門之疆索計里二萬而遙嬰護國
之春秋得歲八千以上更乃攝提香瑞太紫呈祥跋烏揚

若木之輝飛兔躍皋塗之秀珠聯晷緯七辰環朱鳥之躔
律應元辰三始獻黃輝之錄占帝車之次舍兆應時巡考
天目之司方卜云祥習蒼龍伏輓扶玉輶以南行鏤象載
瑜耀金輦而春省薌清紺席天田覩土之初轂轉黃街月
地試鐙之候豐隆翊列川原被黼藻之文大丙陪趨警蹕
有風雲之氣貔貅按隊煬萬竈於周廬角亢扞芑駕六提
於壽域茅茨不飾雕幾徵器之華鳧藻多歡曼衍屏尋
幢之伎江魚竹筍入寶鼎而調芳漁唱農歌躋彤墀而奏
雅餘糧戒躡駢鑒時輟於前驅供帳無譁繒粟悉攜於後
乘瀛塹止輦狨三輔而輦黃樞岱畎靡旃輶二東而周綺
甸黃駒用饗申禋日主之祠繡紱重遊攷禮大庭之庫濁
河清濟鬢盛漲於淮黃夏穉秋稔詩嘉生於曷鹵蜀岡萬
屋捐雕申命於司存京峴三山講武博陳夫軍實蠡河滑

笏橫舟玉局之亭浣濯激泓試茗竹鑪之院虎山策馬銀
 灣七里之塘鄧尉探梅玉海萬花之谷洲連茂苑圖罨畫
 於吳閭蔽日具區競昌丰於夢澤鱸鄉列肆羹魚飯稻之
 區鶯脰環溪淨淥香紅之地鴛湖濯楫牙檣過煙雨之樓
 茗水回波錦繡罩鳳皇之麓九螺起伏翠繞吳山雌霓連
 蜺橋平聖水東西夾鏡標十景於乾文橫側成峰峙雙高
 於坎位松寥竹院化城金碧之居桂宇蘭宮仙杖蓬瀛之
 殿濤頭春上鯨波震盪於靈胥月面西來鸞嶺翺飛於乾
 竺探書禹穴山陰授苑委之奇薦幣龍堂海澨靜冰蟬之
 舍揚舲春月鶯囀艸長之辰展駕江塹虎踞龍蹲之地魚
 禽爵馬揚鳳蓋於中天黼黻文章綯磨圖於陸海綵樹華
 林之苑日麗重輪青溪元武之湖風移五兩珍臺俯瞰零
 法雨於天花窳堵下臨爛神鐙於寶掌鹿泉泳沫同有滄

而含滋玉冠森裝慶嘉名之肇錫廣場擁鐸陳秣幹之軍
容鎖院鏘金第纓綬之嘉頌銀花火樹戲車呈南極之祥
象管龍笙羽穆列西池之奏黃庭刻刻苗仙穎於堯衢翠
蕙亭亭扇祥熏於舜箴千官萬品聯鷺序而景皇儀寸地
尺天席蘿圖而膺帝祉餘醴轉漕平壩鬻於窮閭淮海
賜租普宴娛於豐屋占風候日閩禺共交益紛馳吐氣含
和優優與魁能並鶩商顏逸叟攜鳩杖而獻紫芝姑射高
真應鶴書而徂黃竹華平朱艸繡闥鋪茵穉齒齟年筠駿
候蹕玉雞騰翥知爲孝德之符銀鹿趨趨識是祥和之福
靈臺偃伯參旗徵太紫之宮清剛勤民畢旱底帝青之籍
銀毫批諾絡繹報章銅箭伺晨琮琤行漏龍賓灑翰襄太
乙於詞峰虎僕揮豪掣天吳於筆海跂行踵息依斗極而
扶輪蠕動蠅飛戴晨曦而挾纊是使人能亨運赤蛟鞏厓

馬二
三
於華胥十瑞延禧青鳥銜圖於葢地臣吳中賤質益部微
星兩載望塵犬馬之依

聖主三霄奉日艸木之遇陽春來遊來歌敬矢音於匪頌
以休以助敢效職於隲詩頌曰

芑芑揚州星紀之次物產殷賑炳圖叶契景鑠

皇祖六巡駐蹕

叶

亭之育之無小無大皇闡靈釋葩瑤再

嶽勛我寮采煦我萌隸協氣旁魄召爽津逮閱歲五稔神
人歲觀詢於芻蕘謀及卜筮罔不習吉盼飾以族憬茲西
嶺我牽我軛析支渠搜面內納摯廣輪式廓數萬以二一
元戈旣偃景福畢備惟天佑聖惟聖毓帝萬壽作朋嘉禮斯
萃兩儀完完五緯暨暨元符炳煥以香靈瑞靈瑞旣香南
土所視俟我後來以告疆吏皇日徐之民方艱食糗缶爰
貫梓姑爰貸申命守臣握粟以賜闕歲告豐黔首旣富萬

物熙熙祈請益沸皇曰俞哉幾可小惕行館弗飾供帳弗
麥汝苦貴糴庾粟汝遣汝職置頓幣錙汝畀篚子春省將
降大惠厥明孟諏先戒俞騎華鐘鏗鳴葆羽沛艾

茲輿鳳駕

大駕爰發太馭掌輶上方設棧百禮有王萬

靈幽輶岱祇參乘川后鼓枻山花蘆薈江雲蒼蔚金塘駮
駮玉泉溶濟魚噉烏縣男耕女織岳牧肅列烝徒連襪陰
有鳴鶴阜有神驥有麥有桑有倉有積駢田城郭儼霽都
市

皇帝純孝黼闈問視珠服玉饌海隅錫類

皇帝神武星弧月駟簫勺隱作奄有窮髮

叶

皇帝睿聖亮章顯懿寶文深鏤輝山藻水之綱之紀四目
畢達叶洪惟帝光暨於晡昧既醉既飽百昌咸植洪惟
帝施逮於蹠蹠

馬二
皇帝之德

聖母之自聖齡萬萬亦且不刼愛景舒長春暉琴麗帝齡
萬萬非數可計豫順以動蟠天際地天祿永釐地靈克配
馨列彌懋六台清泰

聖武遠揚準夷平定恭擬饒歌八章

謹敘

洪惟我 國家靈承景籙黃芽所職煦嘔燾育罕闕眇縣
徠義渠史林區陽西由於郊遊文犀菌鶴駒駟駃騠於極
鑿夫舉踵獮俗歸仁遐稽大庭昊英之先攝提合雒之紀
莫得而比隆焉蠢茲準噶爾者本有元種人介居前輦黃
羝之間倏睽睢肝侵歛蕃落我

聖祖仁皇帝赫怒于征猃狁縻長纓蟠蜎膏齊斧餘孽逋
播喙息蠕動涵衍流沙以西我

世宗憲皇帝簡貔貅張陸網右翦左屠俾無易種時策矣

阿喇布坦稽顙樹額獻言節春秋吏惟謹用是貫其橐街
之戮歲與款塞戰伏爲外臣我

皇上嗣撫八紘聖武旁輝昭瞻棣通旣徽槃駮存魚鳧羌
渾君長咸惕息於王詠願仰維

聖祖遠攻薄伐之義

憲皇赦過宥罪之仁 詔命尉候勿震勿渝用牧盍我疆
以填撫絕幕有眾皇哉區武之隆軌也會噶爾丹策凌物
故嗣子樸蒙私子恇兇逆臣達瓦齊實惟封豕之心睥睨
闕沈遂縱闇干知自絕於天彝虔劉國人弗恤惟囚人滾
布從臾脅毆屠耆谷蠡之屬用揃參夷誅劉之刑用殫懣
懣遣黎灼爛嚮炎行號走籲告哀近關

皇上御行殿詔鴻臚日華星陳荒憬咸覲賚以錦袷胥毗
之寶楮以禪王大長之符湔以紫駝素鱗之廚天膏湛濡

咸與說愉降人衿被渥恩揖志搏心願注矢荷殳効列於
前驅帝用其衷命將選徒一舉而戡暴定功揚駿烈焉初
皇上納降臣之請簡稽韎韐運籌穆清在庭三事以艱大
告天子曰惟我大清廣輪萬宇撫有海內外準夷敢不
冀其亦含齒戴髮願罔爲臣僕惟天惟

祖宗尙畀予一人矧茲顛顛吁咷孰非予赤子今弗祓於
焚炎聽其爪剛齒決羣聚而殲旃則予一人不克開於民
之麗爰是授簡武臣播告方略庀水衡於太府鳩票佼於
名王合羽林材官蕃部控弦之士二萬有奇分道躡朔方
踰崑崙徵眾撰日咸會於伊犁師行浹旬有嘉折首天波
潏潏鯨鯢泳涖謹聲軌屬疾於置郵更慮六師騰驤下國
震業命內附者勿離其甌脫渙汗匝洽龍文首塗箕張翼
舒皇旅輶輶洗兵瀚海刷馬陰山陵崆峒騰截薛輪蹕所

歷耕童扶犁收豎刈藿溫風翔而靡艸秀甘雨集而枯茅
榮準夷鄰部噶爾丹多爾濟等弛戎徹衛率魑髻左言待
於沙漠其達瓦齊宰塞宰桑咸劉爲讐民越軼林莽斃面
蹠足喁誦 睿旨恩深於肌其柴池訛虎欺猓嚙則兜
離任休之宴娛也其扶攜任戴絡繹賁擊則莖杆緇絮之
儲侍也其羶香衍溢壺簞樂胥則燠蠡潼酪之酣滑也達
瓦齊於是無子民之侍匹馬隻輪之衛鼠思狙伏延頸天
刀我師采入其庭區部羌夷咸復厥邑逋臣鳩定還爲王
人西傾底平 天子大凱典禮大備茅社酬庸唐哉皇哉
粵若稽古帝三年克鬼方六月伐玁狁皆頓首耀武張皇
鋪敦文命敷土防風就戮專車志懣義賸有征自惟姚帝
格有苗文王降崇景鑠隆古然而干羽未奏苗人逆命崇
墉雉屹厥惟難哉未有折筮驅除師行衽席而大憝平旦

中外禔福如今日者則以

聖德巍巍翼翼比於虞周而

列祖纘興蕃釐累洽有萬萬禔罕能媲者以故西戎卽敘
不假因壘七旬之事焉抑臣聞之惟天權輿不有異類準
噶爾瑪介險遐淹暑効順上天庸釋其命旣假手達瓦齊
芟夷由孽復俾蔡莽器昏白卽於丕刑則其繫於惠迪從
逆慶殃之理甚大臣奉使海圻遐聞大號不勝率舞謹擬
鐃歌八章詞曰

帝受命昭景炎憲參旗運斗鈐赤帟張雷鼓嚴建道遊崇
嶽詹萬靈娛百禮咸溥德施卮庶誠孳枿栽濡鯁鯁翠琬
鏤重譯漸一章渠搜順軌常羊爰賓有恆準夷瘼號以信堂
堂漠野

烈祖於榛叢莽載薙穀穀勿震逮我

憲皇變伐用振簫勺蒐慝猥邸悉臣古黃文粹般從上林
丕顯我下武右序我思文章二圓祇鴻祐我疆垓埏裔夷享
王祀衍護兮順則大降制彼猖狂蠢蠢逋誅人沸炎如蜩
蟬孽子既畢屠賊臣還胥戕款關凱焚西呶頭屢搶
帝曰吁言何哢維清緝熙外大國是皇橐街待縣玉門胡
可望天不誨爾凶德予惟敢不獲章三台吉孔武僞準謂不
龔毒藎藎芥將罹於凶賢王畢逋且渠從睇我戍候馬首
東 帝闡如咫顙顙通龍麟盼飾大賞釀告

皇帝綬有眾叶部種人銛前鋒羣工願羈縻帝爲弗庸往
昔存冉駹惟元臣是同章四業業朔方宛宛酒泉皇旅沛艾
于山于川北變西傾亭障孔延左于右羽載導戎旃師燁
燁 皇聖武匪招斯徠惟予拊爾車童童田廩廩牛同婦
筐復爾所憚人舒飢人哺二雅歌兩階舞章五喀爾喀我蕃

落連穹廬通警柝師行清野恤其瘼斗糧無輸惟潼酪壺
漿謹囂殷絕幕多爾濟今王人悉率賢猛弗漠塵桓桓介
馬士傳是宰桑子俟而蘇來如駛達瓦齊獨夫耳六軍容
有虔天兵四羅遺黎扶傷寢以訛槍壘周隄尺組在脰獲
獸之窮敢予闔戎索于疆景員孔洪魚鞮鱗醬虔厥其降
人畢徠咸復爾次尺土一民非所利七章西郵巨猾底平冊
功大凱旅旋一矢介輪無憊雪來柳往不淹 皇威荒遐
于宣 帝日師武臣賢王公錫爵永饒彤弓豹尾魚旃惟
恩大賚八埏周匝宏溥萬千

列祖

列宗饗禋元堂籌邊百年惟 帝佛時仔肩大德持勝以
謙小臣昧上言詮巍巍成功則

天章

張明府瓊海紀事敘

若乃珠崖北道峻嶒黎母之山瓊海南浮窈冥嶠夷之谷
則有繩行縣度危溪隔銅柱之標儋耳穿胸絕磴昧樓船
之迹而自朱轂內屬瘴雨全消文雉重飛颶波不作環瀛
九縣深漸鄒魯之風卉服諸黎盡革班蘭之舊爰有張星
貴胄燕國詞人汎博望之仙槎訪端明之故宅青剛課農
之暇種竹補棠籃輿行部以還問牛辨馬鉤輶花脚聽蠻
語而悉解陬隅歷綠坊身過縣門而遙看露紛則有春泥
滑滑駢肩叱犢之人溪水濺濺結隊射魚之伴藤梢補屋
生黎編白木之欄蔥管吹簫遊女蹋青陽之曲逡巡薄酒
占雞骨以畱賓鹵莽新昏課牛蹏而取婦他若都梁艾艸
深巖五木之香吉貝多羅徧地三花之樹連翹翡翠能言
之鳥何多合拱檀黎勿翦之材絕少參諸觚志證以山經

良有裨於方言更可當夫說部子也乘桴客歲頻驚颺母
之濤杖節遐嘆懼隕鮫人之泣多君美績示我異書荔子
陰濃展卷在七星巖畔枕根兩足寄情向五指峰頭

沈觀察從軍集敘

國家玉虎銜書銀麈數頁言從井絡載建參旗秉鉞而鑿
凶門贊鼓而馳絕微咨於方召式是應劉維時沈公磨盾
晨嚴聞雞夜起夫其阜囊啟事深嚴密勿之司 紫禁簪
豪清切論思之地晨趨豹尾敬爲蒼生曉度龍沙還參黃
閣爰是短衣匹馬王仲宣束髮從戎走檄飛書枚大夫登
高能賦爾乃開關烏道叱馭蠶叢五丁破斧之山盤礪直
上十鼠磨牙之穴秉燧宵征則文園有難蜀之言武鄉上
渡瀘之表暨平髓令爲梗蔓子未殲緩鶴沙蟲競灑元黃
之血鞠窮麥麴驚呼米醬之儲此則聽谷口之鶉嘯悲同

零雨望水中之鷺跼氣盡前溪者也既而郭令籌邊晉公
入蔡升庸掛客獨高級黯之名妙選儒官復用繞朝之策
遂乃揚于苗格因壘崇降銀河洗兵甲之光銅柱勒丹青
之字於是酬勳麟閣賜宴瀛臺

天子以公實總師言奉揚密命削稿懲屈原之失論事兼
陸贄之長鳳屐銜恩筆旗出守旋以南交重地左轄崇階
載降璽書授之使節古訓是式仲山甫于蕃于宣萬民所
望召康公勿翦勿伐偉以盛烈聞於遐邊公乃盛檢縹囊
深鐫翠琬嘻噦蜀道多閔勞戍卒之詞點竄韓碑著詠
聖神功之作今者黃圖遠廓紫甸遐開一尉候於流沙偃
鯨鯢於絕塞清江碧海爰資作楫之重臣典冊高文還杖
磨崖之巨筆

栖靈寺同戒錄敘

方袍法侶多生原具慧因祇樹閣黎結習曾參定業自非
鵝珠護戒空色想於堅林鷺苑開壇悟根塵於淨域正恐
淹淪火宅退轉邪山六持墮般若之幢十類闍菩提之鏡
平山堂栖靈寺者淮堧蜿伏昭列宿於吳分蜀道棣通蔭
榮光於井絡神霄宰堦創自隋年畫檻層堂成於宋代重
湖渦碧魚鯨傳擊水之音繡嶺浮煙龍虎有過江之氣一
自離宮肇建因岫幌而圖基

翠輦時巡闔巖扃而夙駕金人入夢天開舍衛之城玉琰
飛花地湧多羅之樹法師樵公禪林尊宿經藏上乘鍾阜
度杯天都飛錫赤髭相好驗持律於童真白馬妙明誓傳
衣於震旦彌天慧辨響徹雷音無可敵詩深通禪悅爰集
無遮之會然智炬以燭黃昏同參有漏之因濟沈舟而登
彼岸汪君某端明兄弟其護法輪康樂祖孫俱耽精舍靈

臺浪井絲言酬撥日之庸紺宇文槐蘭若盡布金之地虔
申宏願飾衣具於芻摩更供法筵助檀施於香積用是先
春集眾練日開堂法鼓晨鳴脩幡曉揭爇神香而盥頂貌
座非煙聽清梵以明心魚山發唱窮探珠笈納下界於微
塵妙演銀函度恆沙於浩劫幽巖錦石領頭皈調御之師
紫葭紅房劈趺散曼陀之雨是使聲聞說戒萬德圓通經
律鉤深千袍了悟桑門法器人拈迦葉之花柰苑慈燈代
證辟支之果觀師縣解媿我鈍根數入寶山苦塵縛依然
貧子竭來初地每神遊夢見化人合掌而作偈言誓心以
求度世一瓶一拂遲予參黃蘗之禪三沐三薰招我入白
蓮之社

爲勝國閻陳二公徵詩啟

我國家箕緯膺圖元都御錄天戈所指反舌無聲海水來

宗夜郎不大爰是軫秦庭之哭電埽黃巾章殷武之威風
馳紫塞漸臺放杖揭竿行王莽之頭鉅野殪兇分豕磔蚩
尤之體三靈祇若六宇謳歌嬰子奉以龍圖高寢遷其龜
鼎斯時也八州牙纛上璽綬以請纓五等貂璫望軍門而
解辦蓋以韓仇已報子房義得還劉禹服嗣興有扈終當
事夏鵲飛鰈走盡戴

皇輿蔽苦薇甘寧非周粟然而義君布日冰崖留獨冷之
蠶與母迴飄珠岸茁反風之艸其有七旬逆命二尉嬰城
雖吹昧尊堯亦哀同望帝詳其軼事良足慨心日者明祚
不綱燕雲告難翟泉蒼鳥盡蹴飛沙鄴苑銅駝俱淪廢棘
北斗珠旗簪日甲子徇師南朝鐵瑣沈江庚申出迪惟茲
水國古稱鼃鼃爲鄰況值隆車雖有螳蜋不怒維時陳公
倉皇銜恤慷慨登陣封江上以九泥驅市人而制挺九衢

倉楚皆爲李勉之兵百雉崇墉卽是王罷之冢我朝於是命戈船而下瀨揮彈羽以張羅飲馬於河雪滿駒駝之廐連雞爲柵天長驃騎之營藐爾孤城方猶黑子先此孫恩內犯十年未復創夷今茲祖約乞降七校爭爲鄉導銅丸內潰崑岡之石夜燔玉弩斜芒碧落之星晝隕爰以閭公夙膺干楨曾劈海而迅埽鯨鯢素習戎韜請臨城而辨巖蛇馬公果縣車無懼成竹在胸鍛矢輶車長社百樓未動復隍填塹晉陽三版愈艱燒殘卽墨之牛神鎧自炳刈盡耶邪之稻鬼妾可餐

皆圍城中事

饗士中秋摩笛而悲歌饒

吹行師六月帕首而更插犇刀所以南頓舊臣先傷賈復臨濠名將幾實花雲羣公誓斬嚴顏

天子思招余闕鴻置疏網命輸攻揭以虞旛窮島飛書詔橫來蠲其釁社嗟乎愍懷盡室血面朝天高武孤孫青

城搏穎正使杜鵑嘯盡難甦遊岱之魂精衛銜殘奚補窮
 桑之壑矧復陸機入洛河橋登上將之壇庾信適周開府
 進儀同之號二公使勉遵朝旨早豎降旗出皋羽於西臺
 坐左車而東鄉文淵擇主終高銅馬之勛雖齒封侯勿替
 礪山之誓其視呈身短簿投老蠻貊鼓汝弓已盡國人之
 報江花江艸何關野老之悲而乃斷指無歸裹創復戰
 此則鉞斯破斧公且所以悲來觸石移山愚公因之坐隕
 者也果爾江空木杝莫禦龍超風墮紙鳶難爲墨守靈囂
 不舉鼓已絕於死聲妖鳥爭飛人復遊其生魄黃旗紫氣
 爭聞班馬之聲哀雁噪蟬齊和守陴之哭二公雷霆屹若
 鋒刃恬然旋出火以自燔其膏原而奚惜焚巢殺卵百口
 盡葬灰釘折戟沈鎗萬眾猶喧巷陌邱山同穴誰歸先軫
 之元燐火紛流孰辨長弘之血綽最已憐其併命眵盱復

痛於懷沙

閻應元二子後渡江溺死

今者

帝網恢張天閭眈蕩屬勝

朝之苞孽盡貫金雞凡華表之遊魂俱招唳鶴穀城片壤
與魯國以後降沫土故封閔殷頑之待盡從此奎章正史
遂傳韓通丹鼎爰書不名程濟然而實沈無祀峴首沈碑
追侗鬼雄益章官謗某緬懷前詰載訊邦人知廣陵彈盡
之時近祗樹香間之地脩羅戈戟已罹劫燒三災江表夫
容敬建高臺一柱文鑄武鼓摧臧薤露之歌桂棟杏梁黯
慘平陵之色所冀咏懷古蹟少陵述以寄言勸獎忠臣坡
老貽之碑版

謝方宜田制府惠字冊啟

蘇公妙墨傳自典籤沂國贈言成由削牘吉光集翠片羽
知珍量采揚輝半圭已足日者猥頒蟬翼得覩韭花固已
傳官帖於長沙識攬痕於新絳羊太傅之碑字茂德猶存

三
顏清臣之誥身家規斯在矣猶以誠縣筆正伯玉體精已
窺老米之一斑尙冀大王之眞面所慮棘門清重武庫森
嚴陶土行出鎮以還未遑筆札韋郇公判諾而外不暇臨
摹何圖奉到錦贖重貽金錯麥光照几采溢烏絲薤葉回
紋香生紅籀觀其內擲外拓右蹙左盤規矩神明則兼綜
篆素濃纖疏密則另闢章程自非嚙漱靈飛研精皇象何
以一波一磔盡畜棱鋒如立如行不逾尺度雙南拜奉八
角舒芒皆由閣下謬采葭莩過垂眄睵思欲換其凡骨鑿
彼方心故於鈞軸之餘閒賜以璚瑤之祕笈某運錐素拙
布帶非能譚字學而貽誚面牆在翰林而原同畫餅允當
裝池寶翰什襲家珍臨寫萬通坐卧三日但慮書空廚壁
上感天台丈人從教鐵裏門樞謬比智永長者

祭主政盧仲醇文

嗚呼鸞叱鳳靡入懷之夢無徵玉質蘭枯課禮之庭猶在
緋衣晝見淒清嘒管之聲絳綺夜彈窈渺飛霞之佩名齊
管輅愴年壽之不延才促江淹悵榮華之易艾欲挽西河
之慟老淚先揮重過東閣之亭風流頓逝維盧君公孫公
子鏘鏘萬笏之門某水某邱泱泱大風之里探環樹下驚
風慧於初髻稱象舟中識聖童於毀齒婉婉少儀之訓數
馬無憊愉怡子舍之間聽雞自起迄乎對白摘辭硬黃臨
字宗武勝衣之歲口誦杜詩蘭成射策之年家傳宮體宵
分燂掌練香熏四部之書乙夜抽思屬稟貴三都之紙時
則瑤閭載闢珊瑚網宏開仲華衣袞之榮言從綺歲長卿夕
郎之拜原本賦才方策名於畫省終結想於金閨德水投
綸攬明湖之秋柳長淮鼓柁循綵服於南陔至其克相椿
枝久司鹽筴官書衡石佐弛綱於秋荼賓館重茵代傳餐

於廣席囁嚅客到傾心鮑子之知襍穢人來屬耳季心之
諸士處阿翁之廣厦紛今王粲辭家俗傳仲子之清標允
矣陸雲入洛嗚呼人琴淹忽泡景斯須一昔花朝猶見西
園之羽蓋頻年上日曾陪曲水之簪裾倏臨風於蘇晉俄
示疾於維摩爭言祿命之佳三靈無譴竟乏緩和之藥二
豎爲虞嘆仁人之倉猝悲直道之淪殂嗚呼洗馬神清識
好相原非壽者惠連才雋知無年定屬文人愴黃口之無
兄元言誰與幸青鐙之有婦總帳猶陳鉏芝艸於庭前家
冤奚酷殞瓊暉於掌上天道寧論魂兮歸來長吉尙悲呼
於阿騶古而有死邠公應投杖於嘉賓某某交在紀羣悲
纏嵇呂松枝塵尾時接雄譚青艸池塘常懷仙侶雖山公
作達能齊大夢於歸人而向子言哀轉痛浮生於逆旅誦
奚囊之好句慘絕冰絲撫鄒律之故書沈埋玉樹歌薤露

以噓唏望靈旗而延佇

國朝常州駢體文錄卷第二